

四庫全書

集部

欽定四庫全書

集部

詩話總龜卷四十八

六至

詳校官侍郎臣劉躍雲

主事銜臣徐以坤覆勘

總校官編修臣倉聖脉

校對官中書臣李斯咏

謄錄監生臣陳覲光

欽定四庫全書

詩話總龜卷四十六

宋 阮 閱 撰

藝術門

鍾傳領江西日客有以覆射之法求見傳以歷日包橘  
置袖中令射客云太歲當頭坐諸神不敢當其中有  
一物常帶洞庭香

唐宋遺史

何龍圖中正初登第聞西川郭從周精於卜乃以縑素  
求筮從周作一絕贈之云三字來時月正圓一麾從

此出秦關錢塘春色濃如酒貪醉花間卧不還公後  
宦達以三月十五日授知制誥以言邊事忤旨出知  
秦州後移杭州而捐館舍從周之筮何其驗歟

黃州東南三十里為沙湖亦曰螺蛳店予買田其間因  
往相田得疾聞麻橋人龐安常善醫而聾遂往求療  
安常雖聾而穎悟絕人以指畫字不盡數字輒深會  
人意余戲之曰余以手為口君以眼為耳皆一時異  
人也疾愈與之同游清泉寺在蘄水郭門外二里許

有王逸少洗筆泉水極甘下臨蘭溪溪水西流余作  
歌云山下蘭牙短浸溪松間沙路淨如泥蕭蕭春雨  
子規啼誰道人生無再少君看流水尚能西休將白  
髮唱黃雞是日極飲而歸

百斛明珠

王建宮詞百首多言禁中事皆史傳小說所不載者往  
往見於其詩如內中數日無呼喚傳得滕王蛺蝶圖  
之類滕王元嬰高祖子新舊唐書皆不著其所能惟  
名畫錄略言其善畫亦不言其工蛺蝶也惟見於建

詩耳或聞今人家亦有得其圖者唐世一藝之善如  
公孫大娘舞劍曹剛琵琶米嘉榮歌皆見於唐賢詩  
句遂知名於後世當時山林田畝潛德隱行君子不  
聞於世者多矣而賤工末藝得所附託乃垂名不朽  
亦各係乎幸不幸爾

合肥人傳論言曹谷善星厯衍數談事如神為王冀公  
作命書云七十年中一一加美珠灘上事堪誇碧油  
幢下聞鳴鳥十日催還上漢槎公年七十二知襄陽

正得千日召還又云周匝將臨壬戌歲定鼎門前春色異一千日上少三環再入和羹宜盡醉後龔公判西京將七百日再入政府壬戌歲也又云臨去尚猶聞禁漏異姓佳名在史書龔公薨謝之夕漏將盡無子其婿張環掌喪事並古今詩話

俳優門

李家明江南李璟時為樂部頭善滑稽為諷詠璟遊後苑登臺見牛晚卧璟曰午旦熟矣家明曰臣不學敢

上絕句云曾遭寤戚鞭敲角又被田單火燎身間背  
斜陽嚼枯草而今問喘更無人左右之臣皆免冠謝  
罪李氏乃徐溫養子及僭號遷楊氏于海陵璟繼統  
用宋齊邱言無男女少長皆殺之今海陵州宅之東  
小墳十數皆當時所殺楊氏之族也宋齊邱只一子  
輟卒逾月慟哭不止家明曰惟臣能止之乃作大紙  
寫上大書曰欲興唐祚革強吳盡是先生作計謨一  
箇孩兒拚不得上皇百口合何如乘風吹之度至齊



邱家遂絕其縷齊邱見之慚感乃止璟於後苑命臣  
僚臨池而釣諸臣屢引到數十巨鱗惟璟無所獲家  
明乃進口號曰新覓垂釣興正濃御池春暖水溶溶  
几鱗不敢吞香餌知道君王合釣龍璟善之幸南都  
畫江為界舟楫多行南岼至趙北因輟樂停觴北望  
皖公山謂家明曰好數青峰不知何名家明應聲曰  
龍舟輕漾錦帆風正值宸遊望遠空回首皖公山色  
翠影斜不到壽盃中

出江南野錄互見談苑  
所載不同未知孰是

江南李氏樂人王感化建州人隸光山樂籍建州平入  
金陵教坊少聰敏未曾執卷而多識善為詞口諧捷  
急滑稽無窮時本鄉節帥更代餞別感化前獻詩曰  
旌旆赴天臺溪山曉色開萬家悲更喜迎佛送如來  
至金陵宴苑中有白野鵲李璟令賦詩應聲曰碧岩  
深洞恣遊遨天與蘆花作羽毛要識此來棲宿處上  
林瓊樹一枝高又題恠石凡八句皆用故事但記其  
一聯云草中誤認將軍虎山上曾為道士羊

談苑

楊叔寶郎中與眉州人言頃眉州視事後三日作火排  
樂人獻口號其末句云為報士民須慶賀火星去了  
福星來喜台優人問曰火排致語誰做對曰本州自  
來舊例只用此一首

湘山錄

丁晉公鎮金陵嘗作詩有吾皇寬大容尸素乞與江城  
不計年之句天聖中李文定公出鎮金陵一日郡宴  
優人作語意其宰相出鎮所作理必相符誦至落句  
頂望抗聲曰吾皇寬大容尸素乞與江城不計年賓

僚皆俛首文定笑曰是何是何上聞見責

歸田錄

賞花釣魚會詩賦往往有宿思者天聖中永興軍進山  
水石適會宴命賦山水石歌蓋出不意中生優人入  
戲各執紙筆作吟哦狀其一優人或仆於石上衆扶  
掖起既起曰累日來作一首賞花釣魚詩準備應制  
却被這石頭掞倒左右皆大笑翌日降出詩令中書  
銓定內有鄙惡者落職與外任

東齋記

奇恠門

王謝金陵人世以航海為業一日於海中失舟泛一板  
登岸見一翁一嫗皆衣皂引謝至所居乃烏衣國也  
以女妻之既久謝思歸復乘雲軒泛海至其家有二  
燕棲於梁間謝以手招之即飛來臂上取片紙書小  
詩繫於燕尾曰誤到華胥國裏來玉人終日苦憐才  
雲軒飄去無消息灑淚臨風幾百迴來春燕迴徑飛  
來謝衣上燕尾有詩一云昔日相逢因數合如今睽  
遠是生離來春縱有相思字三月天南無鴈飛至來

歲燕竟不至因目謝所居為烏衣巷劉禹錫有詩曰  
朱雀橋邊野草花烏衣巷口夕陽斜舊時王謝堂前  
燕飛入尋常百姓家

撫遺

彭城劉景直雍熙間遊華清宮因題詩於門屏間云天  
子多情寵太真六宮專幸掌中身漁陽鼓動長安破  
從此香肌委路塵是夜夢明皇召去論當時事妃子  
索景直有所贈立作詩曰玉刻水中龍雲牌揭故宮  
霓裳滿天月粉骨幾春風眉勢從山盡裙腰芳草空

共知千古事懷恨與誰同岐王至明皇曰來何晚王  
曰適杜甫到臣帳中誦哥舒翰詩向臣似有德色云  
日月低秦樹山河遶漢宮明皇又曰常愛伊夜闌更  
秉燭相對如夢寐之句李白終無甫之筋骨至如賈  
至崔輔國亦闕自然之句張老死把筆無伊一字遂  
宴飲忽聞寶雲寺鐘聲方覺

郭平振武舊將士分配于錢塘給官屋居之屋在修文  
坊舊為白校書允賃燒藥丹朱欲往而官吏丁踈因

逐之乃破爐而去白因召丁踈同飲謂踈曰大藥為  
吾子所破有小戲術子醒酒乃取盤一面置於膝上  
以指敲兩腕出五色彈子兩枚化為雙燕而飛白曰  
僕射髭甚繁燕好去可減些言未畢二燕化為二小  
劍長五寸餘鋒刃如雨交舞於踈之頤頤間髭落如  
雪踈懼甚白呼劍下盤中依前成二丸納於左右腕  
而去錢昭度贈白詩曰袖裏青鋒秋水寒誰疑雙燕  
是金丸出門風雨如何去空有霜髭在玉盤



無諸彭演西遊鄆縣宿甘泉店閒步原野忽有一少年  
引至一古宮舍甚宏壯梁上有紅絲羯鼓緇數條垂  
于地一老人杖而守之演問曰此何處老人曰開元  
興慶宮也來此者二百年中十二人爾去時莫不為  
詩請書一絕可乎演為詩曰長安宮闕半蓬蒿塵暗  
虹梁羯鼓緇惟有水天明月夜一條空碧見秋毫演  
又曰十二人之詠可得聞乎老人舉一章曰小小蓬  
山刻得成宮簾不動結飛鯨誰將八月天河水瀉到

重樓無浪聲此楊尚書所作也又誦一章曰金人無  
路守瓊山坐見雲生棟宇間忽墜霜飛翠樓曉不知  
龍尾許誰扳此裴中書所作也再詢楊裴之名則瞪  
而不答

錢仁伉尚父之孫也為元帥府中書檢校司徒與中軍  
都虞候金沼鄰居沼所居堂東植牡丹花一本着花  
三百朶其色如血金含稜每瓶子頂上有碎金絲如  
自然蛟蝶之狀一城以為殊異每歲花開張宴仁伉

預焉開寶七年春三月花纔一兩朵開仁伉一夕洪  
飲擊劍程服中單背負大籃左手携鋤腰插六七首  
踰墻而過沼中外無知者鋤取牡丹置籃中乃平其  
地空中聞有吁歎之聲微細若遊蜂音辭曰一花三  
百朵含笑向春風明年三月裏朵朵斷腸紅仁伉異  
之移植於亭後明日沼覺失花為非人力所及來年  
花盛開乃宴召沼沼一見無語得疾以歸至夜憤悶  
不已以刀決腸而卒腸皆寸寸斷果符空中之語

鄭繼超廣州人赴官鳳翔道逢田叅軍同行家累千餘人言是東川替罷亦入西京繼超與欸自言路人有莊在北邙山下因問鞍乘極多何也曰亡室人來多年皆蜀中孤寡家子息亦欲旋旋與人繼超曰願得一人乃令妙香與之是夕歸繼超家數年繼超卜居西洛一日忽謂繼超曰妙香非人也今將歸北邙山舊穴願乞同乘至北邙因問田叅軍何人曰狐也是夕作別妙香歌以送酒曰勸君酒莫辭花落拋舊枝

只有北邙山下月清光到死也相隨翌日同至北邙  
山下老君廟後妙香伴墜馬化為一狐迅走而去並

洞微志

唐王軒字公遠因遊苧羅山問西施之遺迹留詩於石  
上曰嶺上千峰秀江邊細草春今逢浣溪石不見浣  
溪人迴顧見一女子素衣瓊珮謂軒曰妾自吳宮離  
越國素衣千載無人識當時心比金石堅今日為君  
堅不得軒知其異又貽詩曰佳人去千載溪山久寂

冥野水浮白烟岩花自開落猿鳥舊清音風月閒樓閣無語立斜陽幽情入天幕西子曰子之詩美矣不盡妾之所寄也乃答軒詩曰高花岩外曉相鮮幽鳥雨中啼不歇紅雲飛過大江西從此人間怨風月既暮已散期來日會於水濱翌日軒往則西子已在焉又相與飲軒詩曰當時計拙笑將軍何事安邦賴美人一似仙葩入吳國從茲越國更無春西子見之怨慕久之又曰雲霞出没羣峰外鷗鳥浮沉一水間一

自越兵齊振地夢魂不到虎邱山既夜乃散異日又  
相遇而留者逾月乃歸郭素聞王軒之事遊苧羅留  
詩於泉石間莫知其數寂無所遇無名子嘲之曰三  
春桃李苦無言却被斜陽鳥雀喧借問東鄰效西子  
何如郭素學王軒聞者大笑

翰府名談

朱休之家犬歌曰言我不能歌聽我歌梅花今年固自  
可明年當奈何明年兵亂城陷梁亡

詩史

杜少陵因見病瘡者謂之曰誦吾詩可療病者曰何杜

曰夜闌更秉燭相對如夢寐之句瘡猶是也又曰誦  
吾手提髑髏血模糊其人如其言誦之果愈言感鬼  
神亦不妄

古今詩話

石曼卿自少以詩酒豪放自得其氣貌偉然詩格奇峭  
又工於書筆畫遒勁體兼顏柳為世所好余家嘗得  
唐後主澄心堂紙曼卿為余草書其籌筆驛詩詩曼  
卿平生所自愛者至今藏之號為三絕真余家寶也  
曼卿卒後其故人有見之者云恍惚如夢中言我今



為仙也所主芙蓉城欲呼故人往遊不得忿然騎一  
青驪去如飛後又云降於亳州一舉子家其舉子留  
不得因留詩一篇與之余亦略記其一聯云鶯聲不  
逐春光老花影常隨日脚流仙事恠不可知其詩頗  
類曼卿平時語舉子不能道也

永叔詩話

詩話總龜卷四十六

欽定四庫全書

詩話總龜卷四十七

宋 阮 閱 撰

奇恠門

賣墨者潘谷予不識其人然聞其所為非市人也墨既  
精妙而價不二或不持錢米求墨不計多少與之此  
豈徒然者哉予嘗與詩云一朝入海尋李白空看人  
間畫墨山一日忽取欠墨錢券焚之飲酒三日發狂  
浪走遂赴井死人下視之蓋跌坐井中手尚持數珠

也見張明言如此

百斛明珠

太子中允王綸祥符中登進士第有女子年十八歲一日晝寢中忽魘聲其父與家人亟往問之已起謂父曰與汝有洞天之緣降人間四百年矣今夕會此自是謂父曰清非生自稱曰燕華君初不識字忽善三十六體天篆皆世所未識每與清非生唱和及百餘篇有送人詩云南去過瀟湘休問屈氏狂而今聖天子不是楚懷王又贈清非生末句云自有燕華無限

景清非何事戀東宮又雪詩云何事月娥期不在亂  
飛端葉落人間說與人云天上端木開花六出贈清  
非生云君為秋桐我為春風春風會使秋桐變秋桐  
不識春風面題金山云濤頭風滾雪山脚石蟠虬又  
詩云落筆非俗子鼓吹皆天聲豈俟耳目闕慰子華  
燕情蔣穎叔以措字釋之刻於石後嫁為呂氏妻既  
嫁則惓然不復能詩康定間進篆字二十四軸仁宗  
嘉之有女仙傳行於時

天授二年醵鄉相等詐稱上苑花開請幸則天許之乃遣使宣詔曰明朝遊上苑火急報春知花須連夜發莫待曉風吹於是凌晨名花瑞草皆發羣臣並咸服其異

卓異記

唐太府寺隋都水門之地隋平陳於此置叔寶叔寶將亡有飛鳥集於庭以紫畫地作詩云獨足上高臺腐草化為灰欲知我家處朱門臨水開

雍洛異集

嗽金鳥出昆明國形如雀色黃魏明帝時其國來獻飼

以珍珠及兔腦嘗吐金屑如粟宮人爭取為釵鈿謂  
之辟寒金以此鳥不畏寒也宮人相嘲曰不服辟寒  
金那得帝王心不服辟寒鈿那得帝王憐

古今詩話

西蜀張俞嘗遊驪山題二絕云金玉樓臺挿碧空笙簫  
遞響入天風當時國色并春色盡在君王顧盼中玉  
帝樓前鎖碧霞終年培養牡丹芽不妨野鹿踰垣入  
銜出宮中第一花異日宿溫湯見二黃衣吏召其魂  
至一宮闕見仙座殿上問左右曰唐太真妃也與之

論當時事甚詳覺又為詩曰夢魂飛入瑤臺路九霞  
宮裏曾相遇壺天晚景自愁人春水泛花何處去俞  
尚留溫湯閑步野外有牧童持書一紙俞乃開封乃  
仙所為詩云虛堂壁上見清詞似共幽人說所思海  
上風烟雖可樂人間聚散更堪悲重簾透日溫溫曉  
玉漏穿花滴滴遲此景此情傳不盡殷勤囑付隴頭  
兒俞詢牧童從何得對曰前日有一婦人過此遺我  
百錢授此書云明日有衣冠獨步野外子與之余聞



之俞感俞多對士君子道此

青瑣集

治平二年長沙趙琪郎中作廣東憲公宇西軒有荔枝  
數本盛夏方熟召刺史燕賞一夕皆空皮核滿地軒  
之西壁有詩云吾儕今日會嘉賓滿酌洪鍾飲數巡  
遍地狼藉不知曉荔枝又是一番新二廣人多傳異  
之

隋煬帝遊廣陵恍惚見陳叔寶來謁曰聞已開隋渠引  
洪河之水東遊維揚因作詩獻之曰隋室開茲水初

心謀太奢一千里力役百萬民吁嗟水殿不復返龍  
舟成火霞驚流摧陡岼濁浪噴黃沙兩隄人送客三  
月柳飛花日脚沉雲表榆梢噪暝鴟如今疲子俗異  
日使無家且樂人間景休尋上漢槎客喧舟艤岼風  
細錦帆斜莫言無利益千古壯京華煬帝愠曰爾多  
知為後人之利耶

同前

吳興柳歸舜泊舟洞庭君山見鸚鵡數千翱翔其間相  
呼姓字有名清越者名武遊郎者名阿蘇見者名武

仙郎者名自在先生者名蹈蓮路者名鳳凰臺者名  
戴蟬兒者名多花子者或有唱歌者曰吾此曲乃漢  
武鈎弋夫人常所唱者詞曰戴蟬兒分明傳與君王  
語建章殿裏未得歸朱箔金缸雙鳳舞名阿蘇兒者  
曰我憶得阿嬌深宮唱曰昔請馬相如為作長門賦  
徒便費千金君王終不顧歸舜歸舟舟人云相失已  
二日矣

寶應中有元無有春末獨行廣陵郊野夜入路傍村舍

宿北軒下忽聞西廊有人行聲見四人出衣冠各異  
相與吟詠一衣冠長人曰齊紈魯縞如霜雪寥亮高  
聲為子發一黑衣短陋者曰家貧良會清夜時熒煌  
燈燭我能持一故敝黃衣者曰清冷之泉俟朝汲長  
綆相牽長出入一黑衣冠身亦短陋者曰爨薪煮水  
常煎熬充他口腹我為勞遲明方散起而視之乃有  
一杆燭臺水桶破鐺而已

幽恆錄

彭州天台禪院前致仕焦將軍彥賓所創也天台僧行

燈掌之刺史安思謙男守範與賓客道聯句以紀其  
來守範出首句曰偶到天台院因逢物外僧定武軍  
推官楊鼎夫繼曰忘機同一祖出語離三乘前懷遠  
軍周述曰古德玄意遠外牕虛景澄前眉州判官李  
仁肇音聯曰片時松影下聯續百千燈遂請閑僧教  
大師義西八分書於牌翌日有貧子乞食於院見而  
高聲讀之曰人道有初無尾此則有尾無初後五年  
首領俱碎不如尾句者乎院僧驅逐貧子曳杖四顧

曰此後生不遠千里即欲到來人以為狂言果五年  
誅思謙守範伏法鼎夫暴亡此則首領俱碎之義也  
行燈歸寂寺僧蜀王盡遣出之後住持院僧適自興  
元歸則是不遠千里之義也貧子之說一無謬焉

楊鼎城郭都人嘗遊青城山過皂江溺而又出登岍遽  
有老人以杖接引且笑曰元是鹽裏人本非水中物  
旋失老人所在因作詩以紀之曰青城山峭江水寒  
欲渡當時值急湍棹急狂風趁遠岍舟逢恠石碎前

灣手攀弱杖倉皇處命在洪濤頃刻間今日深恩無  
以報令人羞說雀銜環至成都與知己言竟莫究塩  
裏人之義後為居安思謙幕判成都關塩院感疾暴  
亡以塩裏其屍歸上蜀野人間話

海南城東有兩井相去咫尺而異味號雙井井源出山  
源山石罅中東坡酌水異之曰吾尋白龍不見今家  
此水乎同游怪問其故曰白龍當為東城出俄見其  
脊尾如爛銀蛇伏忽水渾有氣浮水面舉首如排玉

筋乃泳而去余定兩井太守張子容為造庵井上號  
思遠亭號洞酌崖有恠樹樹枝腋有詩曰岩泉未入  
井蒙蒙冒沙石泉漱洄為鑿石老生罅隙異哉寸波  
中露此橫海脊先生酌泉笑泉香龍神蟄舉首玉筋  
挿忽去銀釘擲大身何時見天矯翔霹靂誰言鵬背  
大更覺宇宙窄字畫如顏書無名銜日月此詩氣格  
似東坡而言泉漱石老似非東坡又語散緩疑學而  
為之也龍為蛇形小如玉筋

同上



鬼神門

大歷十三年李道昌為姑蘇太守忽一日城南虎邱山  
有鬼題二詩於石壁上其一云青松多悲風蕭蕭聲  
且哀南山接幽隴幽隴空崔嵬白日徒昭昭不照長  
夜臺雖知生者樂魂魄安能迴況復人所親慟哭心  
膽摧慟哭復何言哀哉復哀哉其二云神仙不可學  
中化空游魂白日非我朝青松為我門雖復隔幽隴  
猶知念子孫何以遺悲怨萬物歸其根寄語世上人

莫厭臨芳尊莊生問枯骨生樂徒虛言道昌錄奏准  
勅致祭祭畢其詩乃滅後數日又隱出詩一首曰幽  
冥雖異路平昔忝攻文欲知高卧處山北兩孤墳尋  
于山後得兩墳極高廣至今存焉

唐宋遺史

許周士泊舟淮陰醉題淮陰廟曰脫身仗劍歸明主授  
鉞登壇是得人千騎爭馳擒虎口萬囊不斷堰龍津  
拔旗破趙如摧朽一鼓擒齊速若神功業蓋時雖不  
賞威名震主即危身時來且佩三齊印勢去翻輸一

婦人得意不思防後患窮居何用結邊臣名留青史  
成何事血污西鍾幾掬塵遂使後來征戰者却愁他  
日似將軍還舟方寐夢介士擁見周士曰足下詩固  
好然未合於理也信去楚歸漢起自行伍高祖結壇  
授鉞雖立功名一旦自蘊忿躁之氣外結邊臣內謀  
大叛死為萬世醜吾今血食於此亦出望外而子之  
詩重吾過為懦無所守將安用也

撫遺

賈魏公尹京日忽有人來展刺謁曰前江南國主李煜

相見則一清瘦道士爾公曰太師已物故何得及此  
曰某幼探釋氏未達誤有所見今為師子國王偶思  
鍾山而來懷中取一詩授公曰異國非所志煩勞殊  
清閑驚濤千萬里無乃見鍾山公讀之隨身灰滅

張孝和關中人淳化壬辰年游淮南在壽春與張李二  
生被酒及淮湄入就龍女祠取桐葉寫詩兩句云我  
是夢中傳彩筆欲書花葉寄朝雲投於帳中而去一  
旦獨至其祠忽簾中有婦人邀而置酒贈孝和詩一

絕日落帆且泊小沙灘霜月無波淮上寒若向江湖  
得消息為傳風水到長安孝和告去行數十步忽小  
女奴叫曰娘子令還桐葉勿復置念孝和得之回顧  
惟古祠敗舍而已

李珣字溫叔都官外郎之幼女也八歲能詩嘗作榴花  
一絕云烈火真紅輕皺面晨霞碎剪貼枝條金刀刺  
出猩猩血濺落芳叢久不銷後適江夏人王常同泛  
舟射利江湖間婁徹為江州清風亭記常觀歎美珣

曰未之盡也何不云青山綠水萬里有盡處清風明  
月千古無老時一日舉其文於徹徹卒用其言為破  
題不久常死而珣溺舟於三山磯下後三日屍忽出  
於水中士人異之為立廟熙寧間都人張芝過廟作  
三絕焚於廟中一云風軟潮生江水平遙峰隱隱浸  
寒青自從香骨沉波底獨我為詩弔爾靈二云軋軋  
櫓聲離遠浦蕭蕭帆影落寒濤殷勤滴酒陳佳果將  
此深心慰寂寥三云江雨初晴遠岫低心因啼鳥陡

思歸爾如會我題詩意魂夢相求一處飛既夜一青  
衣召云娘子奉俟久矣芝曰娘子為誰青衣曰早來  
獻詩與誰耶芝乃悟見一婦人謂芝曰早來佳章欲  
托以夢寐是或不真不能盡所懷故求面見妾溺此  
時水官令賦詩及校九江會源錄一夕而畢水官大  
悅令江神出其屍顯其靈今有祠在此血食於人謝  
子之詩意所不敢當荅以詩曰梅天半霽江水漲水  
搖花影紅蕩漾東風拋雨過江西截江一瞬生銀浪

間然不見鷗鷺飛  
漁唱四沉烟暝蕩  
忽然晴霽碧虛闊  
水色天光月下上  
柳風和軟浪無聲  
客櫓嘔軋中流鳴  
兩岬沙頭拾翠女  
嬉笑攜手相將行  
秋入空江潦水靜  
澄江一碧如寒鏡  
遠帆滅沒入雲中  
菱唱微茫晚風暝  
西風脫木露三山  
隱隱樵歸亂石間  
霜猿哀落岩前月  
杜宇枝間更啼血  
蓬窓風緊客衣單  
中夜危腸幾欲絕  
我本名家閨中女  
聘得良人共途路  
相將雲水二十年  
所得歡心亦無數  
豈期天禍及一



身夫死身沉大江去猛風吹雲無定踪盡日陰愁難  
得雨秋高水冷白骨寒孤兒稚女歸何處因公遺我  
白玉篇慰此窮泉生和煦明朝仙舸宿何州回首寒  
江烟雨暮芝見詩嘆賞久之又出白金二百星贈芝  
曰煩礪一石載妾前事亦有奉報如何芝受其金送  
芝出幄則已五鼓矣芝後因循不能為立石舟再過  
三山下幾至傾覆是夜又夢其女深詬責之負其事

翰府名談

李羣玉校書過二妃廟題詩曰小孤洲北浦雲邊二女  
明粧共儼然野廟向江春寂寂古碑無字草芊芊東  
風近墓吹芳芷落日深山哭杜鵑猶似含顰望巡狩  
九嶷如黛隔湘川題黃陵廟詩曰黃陵廟前芳草春  
黃陵女兒茜裙新輕舟小櫂唱歌去水遠山長愁殺  
人又曰黃陵廟前春已空子規啼血淚春風不知精  
爽落何處疑是行雲秋色中羣玉自以第三篇春空  
便到秋色踟躕欲改二女俄出焉羣玉悉其所陳而

題於後涉重湖至潯陽太守段成式索為詩酒侶具  
述其事後二年而羣玉逝故哭李詩曰酒裏詩中三  
十年縱橫唐突世喧喧明時不作禰衡死傲盡公卿  
歸九泉又曰曾說黃陵事今為白日催老無男女累  
誰哭向泉臺

虔州布衣賴仙芝言連州有黃損僕射五代時人僕射  
蓋仕南漢也未老退歸一日忽遁去莫知所在子孫  
畫像事之凡三十三年乃歸坐阼階上呼家人其子

不在孫出見之索筆書壁上云一別人間歲月多歸  
來人事已銷磨惟有門前鑑池水春風不改舊時波  
投筆而去不可留子歸問其狀貌云甚似影堂中人  
也連州相傳如此其後頗有祿仕者

父子病熱稍昏夢中神游陰府見閻王升殿治事有數  
鬼招一人至一吏前白曰此人在世惟務持人陰事  
思於財物雖無過者必巧造端以誘陷之然後摘抉  
准法合以五百億萬斤柴於鑊湯中煮之王曰可令

赴獄有一牛頭梓執之而去其人私謂牛頭曰君何  
人曰吾鑊湯獄主獄之事皆吾主之其人又曰既為  
獄主固首主也而豹皮襖若是敝鬼曰冥中無此皮  
若陽人焚化方得吾名不顯於人間故無焚貶者其  
人又曰某之外氏獵徒也家常有此皮若蒙主見憫  
少減柴數得還即焚化十皮為獄主作襯其鬼喜曰  
為女去億萬二字以敗其徒則汝得速還兼免沸煮  
之苦二三人於是又入鑊煮之其牛頭者時來相問

小鬼見如此必欲庇之亦不敢令火熾遂報柴足既  
出鏊束帶將行牛頭曰勿忘皮也其人乃明顧曰有  
詩一首奉贈云牛頭獄主要知聞權在閻王不在君  
減刻官柴猶自可更求枉法豹皮視牛頭大怒叉入  
鏊湯益薪煮之父子既寤語於徒曰須信口是禍之  
門並百斛明珠

周祖起於鄴范魯公遁迹民間執紙扇偶題云大熱去  
酷吏清風來故人坐茶肆中忽一形貌怪陋者前揖

之曰相公相公勿慮勿慮律其扇曰輕重無准更得  
舞文何止大熱耶公當深究獄弊持扇急去後一日  
於古廟後門鬼手中持其扇乃茶肆中見者未幾周  
祖果得公於民間遂大用憶陋鬼之言首議刑於疏  
曰先王所恤莫重於刑今繁苛失中輕重無准民罹  
橫刑吏得舞法周祖從其言命公與知雜張浚等刊  
定五年書成目曰刑統

玉壺清話

詩話總龜四十七



欽定四庫全書

詩話總龜卷四十八

宋 阮 閱 撰

鬼神門

余與魯直壽朋天啓會于伯時齋看詩卷皆仙鬼作或  
夢中所作也又記太平廣記中有人為鬼物所引入  
墟墓皆華至洞戶忽為劫墓者所驚出遂失所見但  
云芄花半落松風晚清吾每愛此兩句故附之書末  
王著洛陽人也七歲能屬文十四進士及第初依師宛

句縣張嘏東京應舉久不知消息賃居相國寺東因  
出通衢忽遇張嘏遂邀茶肆叙濶至乃稱蝴蝶詩最  
嘉云今夜君棲芳草裏為傳消息到王孫嘏無言忽  
然不見但驚問鄉人云卒已半年著自及第便歷華  
省至翰林學士只及中年而終

郡閣雅談

西川宰相高駢版築羅城日有守禦指揮使姜知古分  
得西南趙波塊即趙畚相公墳也知古號令候曉開  
之是夜有人黃衣束帶瘦骨長卓立于知古前曰趙

相公使上書知古驚覽書末後有詩一首頃之鬼不見詩云我昔勝君昔君今勝我今人生一世第何用苦相侵

保大中廣陵裡城隍因及古塚得石誌一所云日為箭兮月為弓四時射人兮無窮但得天將明月化不覺人隨流水空山川秀兮碧穹窿崇夫人墓兮直其中猿啼鳥嘯烟濛濛千年萬年松柏風或云李白詞

唐近事

甘露寺僧如昊云收得浙右之明年夏中夜月瑩無雲  
長江如畫有僧持課俄數人自西軒領僕廝輩挈酒  
上江亭而止於明月臺相遇坐定命酒羅列昊竊窺  
之思中夜禁行從何而至必是幽虛於牕隙俯伏伺  
之東向一人衣南朝衣西向一人衣北朝衣北向一  
人衣縫掖衣指南向者設禮而坐東向一人衣朱衣  
霜簡清瘦多髯飛杯之次東向者曰今日恣縱江南  
之游皆不乏風流矣僕嘗記公云何人種得西施花

千古春風開不盡可謂越古超今矣次至西向者復曰  
各述旦襄日臨危一言曰趙臺能為賦邢陽解獻書  
可借西川水不救轍中魚次至縫掖舉白而歌曰偉  
哉橫海鱗壯矣垂天翼一旦失風水翻為螻蟻食巡  
至東向云功遂侔昔人保退無智力既涉太行險茲  
路信難涉次至朱衣乃高吟曰握裏龍蛇紙上鷲邊  
巡千幅不將難顧雲已往羅隱耄更有何人逞筆端  
吟罷東樓晨鐘遽鳴僧戶軋然而啓忽爾而散

桂花

聚談

卷四十八

秦太虛言寶應民有嫁娶會客者有客徑起出門若醉甚將赴水者人急持之客曰有婦人以詩招我其詞云長橋直下有蘭舟破月衝烟任意遊金玉滿堂何所用爭如年少去來休倉皇就之不知其為水也然客亦無他夜會說鬼與叅寥叅寥舉此聊為記之

坡詩話

唐丞相馬植弟固武威太守固弟西漂太守二弟聞植

罷安南都護又除黔南不得意維舟中古寺前夜月  
如畫見白衣人緩步隄上吟曰栽竹為筒作笛吹鳳  
凰池上鳳凰飛勞公更向黔南去即是陶鈞萬類時  
厯厯可聽遣人尋訪已失之後黔南去再入為大理  
卿遷刑部侍郎判鹽鐵遂大拜

大厯元年元載因早朝有人獻詩載令左右收之候入  
中書省其人曰若不能讀請自誦一篇曰城東城西  
舊行處城裏花飛柳如絮海燕啣泥欲下來屋裏無

人却飛去吟畢不見乃知其非人也載後敗家破妻  
被戮

馮翊夏陽縣據大河有異河清澈可鑒大和中縣尉趙  
生一夕與同輩聯步望月於異泉上忽有人貌甚黑  
綠袍自泉中出徐吟曰夜月明皎皎綠波空悠悠生  
且驚其水溺明日生再遊異水見廟中土偶人被綠  
袍視之其貌乃昨日吟詩人也

元和中  
有陸橋家于丹陽居有池塘亭榭一夕有人叩



門急視見一人儀狀秀逸自稱曰沈約聞公雅好詩  
故來奉謁既而呼左右曰召青箱來有一兒年可十  
歲約曰此吾子也欲使紹吾舉故名青箱然亦能詩  
從吾與范僕射過臺城曾作感舊詩令諷之曰六代  
舊山川興王幾百年繁華今寂寞朝市昔喧闐夜月  
琉璃水春風柳色天傷時為懷古垂淚國門前忽不  
見

唐燕士晉昌人隱于九華晚步山下見一白衣少年閒

步自若曰澗水潺湲聲不絕溪壠茫茫野花發自來  
自去人不知歸時長對空山月歸問里人曰是吳氏  
子善詩卒僅數年矣

錢起寓宿驛舍聞窓外有人曰曲終人不見江上數峰  
青起怪之十年後就試座主李時試湘靈鼓瑟詩落  
句意久不屬遂以此一聯續之乃中魁選詩全篇云  
善鼓雲和瑟常聞帝子靈馮夷空自舞楚客不堪聽  
雅調悽金石清音發杳冥蒼梧來怨慕白芷動芳馨

流水傳湘浦悲風過洞庭曲終人不見江上數峰青  
劉山甫隨侍官於嶺外北歸泊舟洞庭登岼見有北方  
毗沙門天王廟祠因謁之見廟宇頽圯乃題云壞墻  
風雨幾經春草色盈庭一座塵自是神仙無感應盛  
衰何得却由人見夜夢神責曰我南岳神也汝何相  
侮俄而風濤大作舟幾覆悔謝徹去詩牌乃止

古今

詩話

長安中秋望夜有人聞鬼吟曰六街鼓歇行人絕九衢

茫茫空有月又聞有和者云九衢生人何勞勞長安土  
盡槐根高俗云務本西門是鬼市或風雨暝晦皆聞  
其喧聚之

南部新書

開元中有幽州衙校姓張妻孔氏生五子而卒後娶李  
氏妬悍狠戾虐遇五子鞭撻不堪其苦哭於孔氏之  
墳母忽於塚中出撫其子悲慟久之因以白布巾題  
詩贈張曰不忿成故人泣涕每盈巾死生今有隔相  
見永無因盒裏殘粧粉留將與後人黃泉無用處浪

作塚中塵有意憐男女無情亦任君欲知腸斷處明月照孤墳五子得詩以呈其父其父訴於連帥連帥上聞李氏流嶺南

建隆初有人行於巴峽夜泊舟於江渚忽有人諷詠曰秋逕填黃葉懸崖露草根猿聲一叫斷客旅數重魂其音苦切激昂而悲如是通宵凡吟百遍初疑舟行秀士也及曉訪之其所泊岼殊無舟舸但空山邃林溪谷絕幽爾岼岼尋訪數處有二腳迹長二尺許

東南復州門街東有劉氏舊宅宇舍橫斷敝壞鮮有人  
居梁太保震有遠房弟伯升秀才請居之貴其幽致  
而肄業既憇馭月餘辰夕甚安一日晝寢夢魘久之  
方寤乃曰適夢一女子綠裙紅袖自東街而來泣而  
呼曰聽妾幽恨之句詩曰卜得上峽日秋江風浪多  
巴陵一夜雨腸斷木蘭歌梁因稱嘆而覺竟無他說

脞說後集

鬼仙詩曰仙人未必便先去還在人間人不知手把白

鬚從兩鹿相逢却問姓名誰又云江上檣竿一百尺  
山中樓臺十二重山僧樓上望江上指點檣竿笑殺  
儂又云爺娘送我青楓根不記青楓幾回落當時手  
刺身上衣今日為灰不堪着又曰酒盡君莫沽壺傾  
我當發城市多罽塵還山弄明月又云浦口潮來初  
渺漫蓮舟溶漾采花灘芳心不愜空歸去會得潮平  
更折看又曰忽然湖上片雲飛不覺舟中雨濺衣折  
得荷花渾忘却空將荷葉蓋頭歸又曰寒花白露裏

亂山明月中是夕苦吟罷秉燭與君同

黃魯直登荊州亭柱間有詞曰簾捲曲欄獨倚銀屏暮  
天無際淚眼不曾晴家在吳頭楚尾數點雪花亂委  
撲漉沙鷗驚起詩句欲成時沒入蒼烟叢裏魯直曰  
似為予發筆勢類女子又有淚眼不曾晴句即鬼也  
是夕有女子絕艷見夢於魯直曰我家豫章附舟墮  
水死于此登亭感而作不意公能辨之魯直覺曰此  
必吳城小龍女事

同前



佞媚門

陳瑄太師任西川有愛姬徐氏郾城令之女也令欲求  
彭牧以紅絹數寸作二十八字遣其妻私示其女曰  
深堂富貴事風流莫忘生身老骨頭因與太師歡笑  
處為吾方便覓彭州人皆鄙之

鑑戒錄

鎮楊州請章孝標賦春雪孝標作詩曰六出花飛處處  
飄粘窓拂砌上寒條朱門到曉難盈尺盡是三軍喜  
氣消

唐李嶠少負才華叅知政事封鄭國公長壽中則天鑄  
八稜銅柱題曰大周萬國述得天樞紀革命之功貶  
皇家之德天柱下置鐵山翁師子琪璘圍遼武三思  
為文朝士獻詩不可勝紀惟嶠詩冠絕當時曰轍迹  
光西崦勲庸紀壯燕如何萬國會諷德九門前灼灼  
臨黃道迢迢入紫烟仙盤正下露高柱欲乘天山類  
叢雲起珠疑大小懸聲流塵作劫業固海成田聖澤  
傾堯酒薰風入舜絃忻逢下生日還遇上皇年后憲

司發附會韋庶人左授滁州別駕

大唐新語

琢句門

唐僧多佳句其琢句法比物以意而不指言一物謂之  
象外句如無可上人詩曰聽雨寒更盡開門落葉深  
是落葉比雨聲也又曰微陽下喬木遠燒入秋山是  
微陽比遠燒也用事琢句妙在言其用而不言其名  
耳此法唯荊公山谷東坡知之荊公曰含風鴨綠鱗  
鱗起弄日鶯黃裊裊垂此言水柳之用而不言水柳

之名坡別子由曰猶勝相逢不相識形容變盡語音  
存此用事而不言其名山山谷曰管城子無食肉相孔  
方兄有絕交書又曰語言少異無阿堵冰雪相看有  
此君又曰眼看人情如格五心知世事等朝三格五  
是融法也後漢江云常置人於險處然句中眼者世  
尤不能解王荊公欲新政作雪詩曰勢合便宜包地  
盡功成終欲放春回農家不念豐年瑞只欲青雲萬  
里開

韓魏公罷政判北京作園中行詩曰風定曉枝蝴蝶亂  
雨勻春圃桔槔閒意趣所至多見於嗜好

歐陽文忠公喜士為天下第一好誦孔北海座上客常  
滿尊中酒不空之句

范文正公清嚴而喜論兵好誦兵衛森畫戟燕寢凝清  
香之句

李師中送唐介謫官詩曰去國一身輕似葉高名千古  
重如山並游英俊俊顏何厚已死姦諛骨尚寒已而聞

介超月首上任大悔乃以書索詩唐公笑曰吾正不用此無對屬落韻詩送還李乃悟一身千古非協對也

東坡遊羅浮詩曰潛鱗有飢蛟掉尾取渴虎我來方醉後濯足聊戲侮想見海上超放之類然後疑不能掉尾雪裏芭蕉也

王榮老渡觀江風作不得濟父老曰公篋中畜奇物此江神極靈獻之當得濟榮老有玉麈尾端石硯宣包

幃獻之皆不驗有魯直草書扇頭子題韋應物詩曰  
獨憐幽草澗邊生上有黃鸝深樹鳴春潮帶雨晚來  
急野渡無人舟自橫取視儻恍之勢曰我猶不識鬼  
識之乎以獻之香火未收天水相照如鏡南風徐來  
帆一飽而濟余謂神必元祐仙客不然何嗜之深也  
李白詩曰昔日芙蓉花今為斷腸草以色事他人能得  
幾時好陶弘景仙方注曰斷腸草不可食其花美好  
名芙蓉花

柳子厚詩曰漁翁夜傍西巖宿曉汲清湘焚楚竹烟消  
日出不見人欸乃一聲山水綠回看天際下中流巖  
上無心雲相逐東坡評詩云以奇趣為宗反常合道  
為趣熟味之此詩有奇趣其尾兩句雖不必亦可欸  
乃舟人相呼聲相應也


冷齋夜話

杜牧華清宮詩云長安西望綉成堆山頂十門次第開  
一騎紅塵妃子笑無人知道荔枝來尤膾炙人口據  
唐記明皇帝以十月幸驪山至春即還宮是未嘗六



月在驪山也然荔枝盛暑方熟詞意雖美而失事實  
唐人題西山寺云幾夜碍新月半江無夕陽或謂冠絕  
古今以其盡得西山之景趣也金山寺題者甚多而  
絕少佳句唯寺影中流見鐘聲兩岸聞又天多剩得  
月地少不生塵最為人傳誦要亦未為至工若用於  
落星寺有何不可乎熙寧中介甫有句云天末海門  
橫北固烟中沙岸似西興尤為中的

遊齋間覽



詩話總龜卷四十八